

















DISCOVRS
VERITABLE

DE LA PRINSE DE
la ville basse de Carcassonne cy deuant
detenuë & occupee par les Heretiques
rebelles, & maintenant reünie avec les
Catholiques, le quinziésme iour de De-
cembre dernier. 1591.

*Par Monseigneur le Duc de Joyeuse Gouverneur
& Lieutenant general pour la Couronne
de France au pays de Languedoc.*



A L R O N,
PAR LOVYS TANTILLON,

1 5 9 2.

Avec permission.

THE NEWBERRY LIBRARY

Case F

39

326

1592j

THE NEWBERRY
LIBRARY

THE NEWBERRY LIBRARY

1592j



DISCOVRS VERITABLE
 de la prinse de la ville basse de Carcassonne,
 cy deuant detenue & occupee par les Here-
 tiques rebelles, & maintenant reunie avec
 les Catholiques, le quinziesme iour de De-
 cembre dernier. I 5 9 I.

Par Monseigneur le Duc de Ioyeuse
 Gouverneur & Lieutenant ge-
 neral pour la Couronne de
 France, au pays de
 Languedoc.

MONSEIGNEUR
 le Duc de Ioyeuse, ayant
 mis son armee en cam-
 paigne le premier d'Auril mil cinq

cens quatre vints vnze , il mist
 en l'obeissance de la saincte Vnion
 tout le pays du Mineruois, depuis
 Narbonne , iusques à Castelnau-
 darry , où il print par assaut ou
 par rendition plus de quarantecinq
 villes ou villages fermés ou autres
 fors , mesmes la ville & tours de
 Cabardes , qui est tresfort & im-
 portant , & s'approchant le temps
 de la recolte , il mena son armee
 ez enuiron de la ville basse de
 Carcassonne , ou il feit le dégast
 & empescha les habitans de pou-
 uoir rien recueillir , les tenans si
 ferrez dans la ville qu'a peine &
 grande difficulté pouuoient sortir.

Et se voyans reduictz les habi-
 tans

5

bitans en telle extremité & qu'on faisoit demourer aux sorties qu'ils faisoient partie de leurs soldatz, sur la place, ne pouuans plus endurer, ilz aduertirent plusieurs fois Monsieur de Montmorancy de les venir secourir veu qu'ilz ne pouoyent plus endurer.

Ledit sieur de Montmorancy considerant que ceste ville luy estoit la plus importante du Languedoc, tant pour l'assiète, que pour la forteresse fit tous ses efforts de faire la plus grande assemblee qu'il luy fust possible ayant a ces fins assemblé vnze cens maistres & deux milhommes de pied, la pluspart desquelles forces luy fu-

rent amenees par le sieur Alfonse, du Dauphiné, toutes lesquelles forces Monsieur de Montmorancy assisté dudit Alfonse, & plusieurs autres grandz Capitaines, & beaucoup de noblesse, amena iusques au lieu de Caissac pres de Narbonne, avecques sept pieces de canons, & y passa la riuere Daude le dixiesme d'Octobre pour aller tout droit à Carcassonne, affin de les eslargir & y faire porter les viures.

Monseigneur le Duc de Joyeuse estant aduerty de l'approchement dudit seigneur de Montmorancy & de son armee, aduertist toute la noblesse de nostre party

ty pour le venir trouuer en diligence : ce qu'ils firent , & se voyant assisté d'une tres-belle troupe , il leue son armee , qui estoit deuant Carcassonne , & s'en va au deuant de l'armee de l'ennemy , estant les forces de six cens maistres ou il y auoit du moins quatre cens gentilhommes tous François, deux mil hommes de pied François , & deux mil Tudesques , & quatre pieces d'artilleries.

Pensant prendre au lieu de la Redorte pres de Rieux la Cauallerie Espagnole (qui estoit de cinq cens Cheuaux , accompagné de six cens hommes de pieds)

pieds) qu'il auoit enuoyez audit
 lieu de la Redorte pour s'y ra-
 fraischir : Il trouua qu'elle ne si
 estoit arrestée , mais auoit passé
 oultre iusques à Salces , mais
 pour cela ne la voulut atten-
 dre , & ne laissa de continuer
 son chemin avec les forces Fran-
 çaises , & Tudesques pour aller
 deuers l'ennemy , lequel il trou-
 ua auoir desia passé la riuiere
 avec toute son armee , & ad-
 uancé deux lieuës de deça , &
 print vn petit lieu nommé Ces-
 feras.

Le lendemain les deux armées se
 virent de bien pres, ou Monseigneur
 de Ioyeuse presenta la bataille, mais
 les

les ennemys n'en voulurent point gouter. Le iour apres les forces de l'ennemy s'approcherent & gaignerent le lieu d'Azilla, que nous tenions à faute que ceux qui estoient dedans, n'eurent le cueur de tenir iusques à ce que nostre armee se fust aprochee, ou ilz trouuerent des viures pour se nourrir quelques iours.

Voyant Monseigneur de Ioyeuse par la contenance de l'ennemy, qu'il ne vouloit point combattre, mais gaigner peu à peu quelques lieux pour s'approcher de Carcassone afin de se ietter dedans. Il se resolut de gaigner le champ de bataille, pour les contraindre au combat, & l'empescher de passer plus auant, ce que voyant l'ennemy, il fit semblant se vouloir battre, & à ces fins le Sieur

Alphonse s'approcha de nostre armee, avec quatre cens maistres qu'il menoit pour l'auantgarde, venāt de grand furie contre nostre auantgarde, qui estoit conduite par Messieurs de Cornisson & de Perdeac: & comme il fut à la portee de la lōgueur de la lance, au lieu de donner voyant la resolution des nostres qui l'attendoient, & qu'ils pensoient esbranler, luy glissa à costé, & fit deux passades sans oser donner, ou il fut tiré grand nombre de pistolades, mesmes par les enfans perdus d'vne part & d'autre: Monseigneur de Ioyeuse se presenta avec tout le corps de l'armee pour monstrier toutes ses forces, afin de les attirer au combat, mais iamais aucuns de l'armee ou estoit Monsieur de Montmorancy ne se voulut

voulut approcher demeurāt à vng quart de lieue loing.

Nos harquebusiers commencerent d'attaquer l'escarmouche iusques audict lieu d'Azillan que l'ennemy tenoit, pour les faire sortir au combat, ce qu'ils firent, dont l'escarmouche dura depuis sept heures de matin iusques à quatre heures du soir, & à la fin la place nous demeura, combien que l'ennemy fut logé en vn lieu fort fauorable, & derriere les murailles de quelques maisons ruynees, duquel lieu l'on les tira, & y perdirent force gens, & beaucoup plus que nous.

Et cōme l'ennemy eut remarqué la belle resolution de nostre armee, encores qu'elle fut beaucoup plus petite que la leur, ne voulut plus

retourner au combat , aiās perdu de leur costé quatorze gentilhommes, ou capitaines de qualité qu'ilz laisserēt sur la place pour n'auoir moien de les retirer, lesquels Mōseigneur de Ioyeuse fit ensepuelir honnorablement. Et quelque nombre de soldatz de nostre part, nous ne perdismes que le Sieur de sainct Marfal, deux gendarmes, & fort peu de soldats.

Et voyant l'ennemy la resolution de Monseigneur de Ioyeuse de ne les vouloir laisser passer sans combattre, apres auoir demeuré huiēt iours de plus, & faiēt manger la paille des litz a leurs cheuaux, & tout le ionc & herbages qu'ils trouuerent aux fossez des champs, & vescu l'armee avec de legumes a faute de pain. Toute l'armee deslogea vne
heure

heure deuant le iour plus viste que le pas, parce que la riuiera s'en retournoit, vers Beziers, là où ceste armee se rompit.

Monseigneur de Ioyeuse voyant la retirade de l'ennemy, apres auoir remercié toute la Noblesse qui l'estoit venu trouuer, s'en retournerent à leurs maisons, print son chemin avec son armee, laquelle il alla remettre deuant ladite ville basse de Carcassonne. Ce que voyant les habitans d'icelle entrerent en grand desespoir. Et voyant la necessité en laquelle ils alloiēt entrer, & que leur mal empiroit, sans esperance d'aucun secours: Estant pratiquez par quelques vns que Mōseigneur auoit ietté dedans la ville, feignans estre de leur party. Il a esté si bien proce-

dé, qu'en fin l'on gaigna Mōsieur de Roux, Iuge Mage, & deux Consuls qui pouuoient gaigner vne porte pour bailler entrée à Mōseigneur de Ioyeuse, ce que voyāt le dit sieur il fit venir Mōsieur d'Auterne Lieutenāt de sa compagnie pour executer son entreprise, & luy s'en alla à Limoux, ou estoit Monseigneur le Marechal son pere, pour ne donner ombrage aux ennemis le voyant de si pres.

Et le 15. de Decēbre le dit sieur de Roux, Iuge Mage, & les deux Cōsuls avec les soldats qu'ō auoit jettez dedans, se faisirent de la porte du costé allant a Tholose : & faisant signe à ceux de la cité par le clocher de la grand Eglise, comme auoit esté arresté, Monsieur d'Auterne avec le Capitaine Ostie, descēdirent de la
Cité

Cité en grand diligence avec quatre cens soldats, & vont droit à ladicte porte, ou ils trouuerent quelques autres de la ville de cōtraire volonté, qui y estoient venuz pour resister, mais les nostres enfoncerent si bien, qu'ils se rendirēt maistres de la porte.

Et à mesme instant Messieurs d'Honnous, Perdeac, Mouffolens, la Courtette, & autres braues Gentils-hommes & Capitaines qui estoient pres de là, tout expres s'y rendirent: cōme fit mondit Seigneur de Loyeuse, de Limons en hors dans vne heure & demie, qui fut vne extreme diligence: & se rendit maistre de toute la ville, sauf des deux Citadelles que Monsieur de Montmorancy y auoit faict faire, & à la plus grãde & forte desquelles y estoit monsieur
de

de Lauenallet, fils de mōsieur de Mirepoix Seneschal dudit Carcassonne qui y commandoit , & grand nombre de soldats à gages audictes Citadelles. Outre-plus les habitāns mal affectionnez qui s'y estoient iectez, tous resoluz de mourir auāt de se rēdre, pensant auoir secours de monsieur de Montmorancy deuers lequel ils auoiēt enuoyé plusieurs fois.

Et voyant mondit seigneur de Loyeuse leur resolution, & qu'il auoit à prédre le plus fort, il mande de tous costez en diligēce pour auoir du secours: ce pendant fit descendre six canons du chasteau de la Cité pour battre les Citadelles. Et apres les auoir braquez, mirent des gabions, si qu'il ne falloit que batre. Voyant les ennemis ceste resolution, & que
aucun

aucun secours ne leur venoit, ils parlerent de compositiō, dont l'accord fut faict le mecredy à vnze heures de nuict, ayans leurs vies sauues, & sortirent le lendemain à huiet heures, avec leurs armes, bagage, & tambour: & furent conduits en toute assurance au lieu de Tresbes.

Comme mondit Sieur le Duc se veit maistre tant de la ville que des Citadelles, il fit assembler tous les habitans de la ville au milieu de la place, leur faisant vne belle remonstrance, & fit entēdre qu'il estoit ennemy capital de la tyrannie & captiuité, & qu'il estoit Capitaine & protecteur pour maintenir la liberté, & que les vrayes Citadelles qu'il desiroit auoir en ceste ville pour la conseruation d'icelle; estoit le cœur &

affection de la bonne volonté des bons habitans : Et à ces fins commanda à toute l'assemblée de le suivre, & s'en va tout droict à la grande Citadelle, ou il demanda vn marteau, & en la presence de tous il cōmença à desmolir trois ou quatre pierres, leur commandant de faire le semblable iusques à l'entiere demolition. Et apres les auoir amenez à la petite Citadelle en fit autant. Et cōme il sortit, il fut suiuy & accompagné iusques à son logis de plus de quatre mille personnes, tous les testes nuës, crians à haute voix, *Viue Monsieur de Ioyeuse, qui maintient la liberté,* s'en retournant apres pour faire desmollir les Citadelles, avec telle diligence q'ils ont mis tout à raz de terre. Monsieur de Ioyeuse s'en alla
au Palais

au Palais où estoit vn nouveau Parlement qu'on y auoit dressé pour y tenir le Parlement, & là se fit bailler les lettres d'installation dudit Parlement, ensemble les Seaux & les Registres des deliberations & Arrests qui y ont esté donnez, pour du tout en faire vn present à la naturelle Cour de Parlemēt de Tholoze, pour leurs Estrennes de Noël 1591.

Il a faict arrester prisonnier Monsieur de la Bourgade, qui estoit pourueu de l'estat de premier President, son fils qui estoit Greffier Ciuil & Criminel, Gibron Procureur du Roy, & Jean Boyer premier Huissier, lesquels il a faict mener prisonniers aux prisons de la cité: & tous les autres mal affectionnez à nostre party il leur a pardonné apres leur

auoir faict vne grande remonst-
 ce, & qui ont iuré d'estre fidelles à
 nostre parti Catholique.

Pendant toutes ses choses. Ils vin-
 drent au secours de toutes pars plus
 de quatre mille hommes, veu l'im-
 portāce de ladicte ville. Mōseigneur
 le Duc garda que personne n'entra
 dans la ville craignant vn pillage &
 y proceda si sagement & d'une telle
 prouidence, qu'il ny a aucun habi-
 tant qui aye perdu la valeur d'une
 espingle dans ladite ville, ne aucun
 outrage n'a point esté faict à homme
 ny à femme.

Nous auons occasion de louer
 Dieu de la grace qu'il nous a faicte
 d'auoir acquis vne si grande, forte &
 importante ville, dans laquelle y a-
 uoit six Canōs, quatre Coulleurines,

& plusieurs pieces de campagne,
 & autres sur rouës. Estant icelle ville
 assise au milieu du Languedoc, &
 qui importoit autant & plus en ce-
 ste prouince que fait la ville d'Or-
 leans au pais de France & ville de Pa-
 ris, estant vn des beaux exploicts
 qui se soit fait en France pour nous
 depuis ses guerres.

C 3

F I N.

A MONSIEUR
le Duc de Joyeuse.

O D E.

Quel laurier, ou quelle gloire,
Peut honorer la memoire
De ces braves Cheualiers,
Qui d'un genereux courage
Sauuent les leurs du carnage,
Et des funestes dangers?

Chante Muse genereuse,
Du vaillant Duc de Joyeuse
Les exploits tres valeureux,
Qu'il a faits à Carcassonne
Pour l'appuy de la Couronne,
Imitant tous ses ayeux.

Chante d'un chant Heroicque,
Qu'il est ferme Catholique,
Point subiet au changement,
Et que pour mettre l'Eglise
En sa premiere franchise,
Il ne craindra nul tourment.

Chante

Chante que d'un bon courage,
Il preserva de pillage
Tous les pauvres Citoyens,
Et d'une façon humaine
Qui surpasse la Romaine,
Espargna tous leurs moyens.

C'est luy qui des son enfance,
Pour le soustien de la France
S'accoustuma aux harmois,
Et qui d'un zele equitable,
Non feinct mais tres-veritable,
Faiect la guerre au Navarrois.

Il se souvient que son frere,
Pour combattre ce Vipere
Ennemy de nostre foy,
A Coutras laissa la vie,
Par la maudite enuie
Que luy portoit le feu Roy.

Qui couvert d'hypocrisie,
D'haine & de ialousie,
Contre les fermes François,
Feit mourir ce sien beau frere

Par

Par ce qu'il estoit contraire,
A ce Monstre Biarnoïs.

Vivez en toute assurance,
Seur appuy de nostre France,
Et soyez des bons François
Le refuge veritable,
Et Protecteur immuable
De nos sacro-sainctes Loix.

D. B. P.

F I N.













